

# **Randai**

## **SUTAN PAMENAN**

Berdasarkan cerita (kaba) yang asli dan disusun kembali  
oleh:  
**Wisran Hadi**

### **Pelakon:**

- 1. SUTAN PAMENAN**
  - 2. TUANKU RAJO TUO (Ayah Sutan Pamenan)**
  - 3. RAJO ANGEK GARANG**
  - 4. BUJANG SALAMAIK**
  - 5. INYIAK RANG PALADANG**
  - 6. RANIK JINTAN (Tunangan Rajo Angek Garang)**
- SARATO**  
**URANG-URANG DI GALAGGANG**

I.  
RANDAI PEMBUKAAN

Kalibuik kapa nak rang Tiku  
Kapa nakodo di muaro  
Dijapuik kaba rang daulu  
Kaba Tuanku Rajo Tuo

Bapak dek Puti Sari Malu  
Junjuangan Puti Linduang Bulan  
Urang tasabuik sajak daulu  
Urang kiramaik sati pulo

Hati di dalam raso ka ramuak  
Pikiran indak namuah tanang  
Curito habih gurindam masuak  
Sinan bakato Tuanku Rajo Tuo

TUANKU RAJO TUO;  
Denai nan banamo Tuanku Rajo Tuo  
Tuo baasa bausali  
Tuo jo adaik jo limbago  
Tau diereang dengan gendeang  
Tau dirantiang nak kamancucuak  
Takilek rupo dalam camin  
Denai dibaliak itu pulo

Aluran badan diri denai  
Denai baranak duo urang  
Sikua jantan sikua batino  
Nan gadang banamo Sutan Pamenan  
Nan ketek banamo Puti Sarimalu

Tantangan diri Sutan Pamenan  
Siang bamain sipak rago  
Malam mamancak jo basilek  
Gilo bahuru hura sajo  
Dek bapak kayo mande batuah  
Mamak disambah urang pulo

Kok tantangan Puti Sarimalu  
Iduik dianjuang paranginan  
Pandai batanun jo basuri  
Limpapeh rumah nan gadang  
Sumarak dalam nagari  
Unduang-undang ka sarugo

\*

## II. RANDAI

\*

SUTAN PAMENAN;  
Manolah ayah kanduang denai  
Agak kamari molah tagak  
Ado mukasuik nak disampaikan

TUANKU RAJO TUO;  
Anak kanduang Sutan Pamenan  
Apo sabab ayah dipanggie  
Curai papakan bakeh ayah  
Nak sanang di dalam hati  
Nak sajuak dalam kiro-kiro

SUTAN PAMENAN;  
Makonyo denai ayah imbau  
Lah tadanga galanggang rami  
Eten di ranah Kayutanam  
Galanggang Rajo Angek Garang  
Bari izin denai di ayah  
Pai manampuah galanggang nantun

TUANKU RAJO TUO;  
Galanggang Angek Garang nan kadituruik?  
Angek Garang lain adaiknyo  
Urang mamakn masak matah  
Urang indak tahu salah jo bana  
Maukua panjang ka inyo  
Manimbang barek ka inyo

SUTAN PAMENAN;  
Ayah kanduang janyo denai  
Bari izin molah denai dek ayah  
Pado denai lalok dianjuang  
Eloklah mancaliak galanggang urang

TUANKU RAJO TUO;  
Jiko baitu kato anak kanduang  
Dangkan bana nasehat ayah  
Kok sampai anak di sanan  
Iduik di kampuang urang  
Jan bak ayam kuriak panjang ikua  
Tampan paukua bayang-bayang  
Panjang tajelo urang karek  
Tak usah tinggi dari pucuak  
Tinggi pucuak biaso patah  
Tak usah randah dari tunggua  
Rendah tak ado tampek jatuhah

Ikan rayo dilautan  
Garundang rajo kubangan  
Sutan bana anak di kampuang  
Namun di rantau dagang juo

Paciklah baro di tampuruang  
Abu nan jaan anak buang  
Pagang pataruah ayah kanduang  
Malu nan jaan dibao pulang

Dari parak handak ka pakan  
Tibo di balai balilah samba  
Budi rang tuo jaan dilupakan  
Sampai mati tatap di kana

SUTAN PAMENAN;  
Apo nan kajadi pitaruah ayah  
Denai pacik dipegang arek  
Siang ka denai patungkek  
Malam ka denai pakalang  
Alah ka sanang hati ayah.

\*

III.  
RANDAI

Lah bajalan Sutan Pamenan  
Diilikannyo labuah nan panjang  
Manuju ranah Kayutanam  
Ka galanggang Rajo Angek Garang

Dek lamo lambek di jalan  
Lah tibo candonyo kini  
Galanggang rami alang kapalang  
Sinan taguncang dalam diri

**RAJO ANGEK GARANG;**  
Manolah kalian nan di galanggang ko  
Danga kecek den elok-elok  
Simakkan bana baiak-baiak.  
Aden banamo Rajo Angek Garang  
Batarak di Bukik Siguntang-guntang  
Supayo nak rami galanggang nangko  
Molah kito bamain sipak rago

**RAJO ANGEK GARANG MAIN SIPAK RAGO JO URANG  
BANYAK. RAJO ANGEK GARANG TAJATUAH, URANG  
BASORAK KASADONYO.  
RAJO ANGEK GARANG TAGAK, BERANG MANCALIAK  
SUTAN PAMENAN SATO PULO BASORAK.**

**RAJO ANGEK GARANG;**  
E, waang paja ketek!  
Sato pulo manyorak an den!

SUTAN PAMENAN;  
Ampunlah ambo dek tuanku  
Ampun baribu kali ampun  
Bukan ambo surang nan basorak  
Urang basorak kasadonyo

RAJO ANGEK GARANG;  
Waden jatuh waang kecek an cubadak lareh!  
Aden ko bukan cubadak! Waden tu bukannyo jatuh!  
Tapi waden jatuh tu dek barek badan den surang

Waang ko anak bincacak!  
Anak bincacak jo bincacau  
Anak singiang-ngiang rimbo  
Anak kaladi taleh ladang  
Anak sicangkiang panarahan  
Anak sariduang sarok lawik

SUTAN PAMENAN;  
Usah tuanku tadorong bana  
Urang mandoroang gadang kanai  
Urang panggambang mati jatuh  
Urang pandingin mati anyuik

RAJO ANGEK GARANG;  
Usah marandang di kualo  
Sambirek jalo ka tapian  
Usah waang ulang duo kali  
Maramang bulu kuduak den mandangkalan

Anak cacak samo cacak  
Samo batalua diateh pagu  
Kok iyo waang samo bagak  
Senseangan molah langan baju

SUTAN PAMENAN;  
Kok iyo kareh bana hati Tuanku  
Molah kito cubo agak sajamang  
Untuak pamasiah-masiah langkah

RAJO ANGEK GARANG BASILEK JO SUTAN PAMENAN.  
SUTAN PAMENAN KASUDAHANNYO DAPEK DITANGKOK  
DEK RAJO NAN PANJANG. SUTAN PAMENAN  
MARANUANG MINTAK AMPUN.

SUTAN PAMENAN;  
Ampun. Ampun tuanku.

RAJO ANGEK GARANG;  
Lai ka mintak ampun juo waang!  
Bangang! Awak ketek masuk pulo ka galanggang!  
Baru waang tahu kini, sia waden!  
Iko nan banamo Rajo Angek garang

\*

IV.  
RANDAI

Lah kalah Sutan Pemenan  
Kalah dek Rajo Angek Garang  
Sutan tatangkok maso itu  
Tangkok nan indak talapehan

Sinan tamanuang Sutan Pamenan  
Malu kamano kadilapeh an  
Panek bamanuang inyo bapikie  
Cakak nan musti babalehan

Kaba baraliah hanyo lai  
Namun baraliah sinan juo  
Dijapuik kaba Rajo Tuo  
Lah tasorok darah di dado  
Antah ko apo nan tajadi  
Dipanggie Bujang Salamaik

TUANKU RAJO TUO;  
Manolah buyuang Bujang Salamaik  
Tagak ka mari molah buyuang  
Ado nak ka den sampaian

BUJANG SALAMAIK;  
Ampunlah denai dek tuanku  
Ampun baribu kali ampun  
Mandanga imbauan dari Tuanku  
Tasirok darah di dado  
Mandanyuik ka ubun-ubun  
Mambaleh ka ampu kaki  
Guimanta sabatang tubuah  
Badan bak raso bayang-bayang

TUANKU RAJO TUO;  
Ikolah waang Bujang Salamaik  
Bukan Salamaik caro kini  
Tapi salamaik urang daulu  
Alun dipanggia alah datang  
Alun diimbau alah tibo  
Kini baitu lah dek waang  
Pai japuik Sutan Pamenan  
Antah baa kolah inyo kini  
Japuik tabao kini juo  
Eten ka ranah Kayutanam  
Galanggang Rajo Angek Garang

BUJANG SALAMAİK;  
Kalau baitu kato tuanku  
Samantaro hari lai alun malam bana  
Denai bajalan hanyo lai.

\*

V.  
RANDAI

Rundiang putuih kato salasai  
Babaliak pulang Sutan Pamenan  
Dijapuik dek Bujang Salamaik  
Ka galanggang Rajo Angek Garang

Dek lamo lambek di jalan  
Alah katibo hanyo lai  
Mananti Tuanku Rajo Tuo  
Sinan tabukak kato-kato

TUANKU RAJO TUO;  
Ayah mandapek kaba buruak  
Kaba dibao urang lalu  
Tantangan diri anak kandung

Lah tajadi silang salisiah  
Iyo jo Rajo Angek Garang  
Tapi baalah mangatokannyo  
Pitaruah ayah indak waang pacik  
Badan waang juo mananguangkan

SUTAN PAMENAN;  
Alu tasanda pado dindiang  
Jikok tasandi di balakang  
Buliah diambiak urang lalu  
Malu tacoreang pado kaniang  
Jikok dicoreang dibulakang  
Bisa ditutuik kain jo baju

Namun samantangpun baitu  
Bari izin denai dek ayah

Pai mencari ilmu bakeh tagak  
Iyo ka bakeh inyiak paladang  
Untuang tabangkik batang tarandam

TUANKU RAJO TUO;  
Jiko baitu kato nak kanduang  
Itulah kato sabananya  
Kok mangaruak iyo sahabih gauang  
Kok manyauak takasiak bulan  
Indak nan lakang dek paneh  
Indak nan lapuak dek ujang  
Alah ka jaleh tu dek waang

SUTAN PAMENAN;  
Kalau baitu kato ayah  
Denai bajalan hanyo lai

\*

VI.  
RANDAI

Lah bajalan Sutan Pamenan  
Manuju Inyaik rang paladang  
Mancari ilmu bakeh tagak  
Pembangik batang tarandam  
Lah diiliekan labuah nan panjang  
Labiah pendek liku baliku  
Masuak rimbo kalua rimbo  
Masuak kampuang kalua kampuang

Lah basuo jo Inyiaik Rang Paladang  
Sutan baraja bamacam ilmu  
Sudah baraja bilangan musim  
Maso ka pulang hanyo lai.

INYIAK RANG PALADANG:

Lah anam musim anak di siko  
Baraja babagai macam ilmu  
Kok iyo waang ka pulang bisuak  
Ikolah pasan dari inyiaik  
Jampang sakik indak taubek lai  
Ambiaklah aie agak sacangkie  
Bacolah manto nan bak iko  
Sabik ketek panyabik padi  
Panyabik padi sado nan rabah  
Ubek lakek panyakik pai  
Pai kabukik Sabarullah  
Bajalanlah tujuh hari  
Ndak buliah kito basuo

SUTAN PAMENAN;  
Sagalo ilmu nan inyiak agihan  
Ambo pacik arek diganggam taguah

\*

VII.  
RANDAI

Lah sudah manuntuik ilmu  
Babaliak molah Sutan Pamenan  
Iyo ka ranah Camin Taruih  
Nak manamui ayah kanduang

SUTAN PAMENAN;  
Manolah ayah kanduang denai  
Lah babaliak denai manuntuik ilmu  
Iyo dari inyiak urang paladang  
Nan sakarang kini nangko  
Denai nak babaliak ka Kayutanam  
Ka galanggang Rajo Angek Garang  
Jikok kandak buliah pintak balaku  
Tantu lai tajajak tanah tapi  
Maklum ayah tantang itu

TUANKU RAJO TUO;  
Kilek camin lah ka muko  
Kilek baliuang lah kaki  
Harima mati maninggakan balang  
Gajah mati maninggakan gadiang  
Ayah lah maklum tantang itu

Namun samantangpun baitu  
Adat di lawik bajuru mudi  
Adat di galanggang ba juaro  
Adat di kampuang bapangulu  
Dima aie disauak, di sinan bumi dipijak  
Dima sumua dikali di sinan rantiang dipatah  
Hanyo sakitu dari ayah  
Pulang maklum pado nak kanduang

VIII.  
RANDAI

\*

DI GALANGGANG RAJO ANGEK GARANG.  
URANG BAMAIN BABAGAI PAMAINAN  
SUTAN PAMENAN DATANG JO BUJANG SALAMAIK,  
MANGAPIK AYAM KETEK

RAJO ANGEK GARANG;  
Baa kok waang datang kamari  
Nak maadu ayam roman iko  
Ayam waang ketek saketek dari balam  
Gadang saketek dari puyuah  
Lah ka waang adu pulo jo ayam den  
Lai tahu waang ndak  
Ayam den sagadang kambiang kekah  
Ayam batigo badunsanak  
Sikua jadi musang  
Sikua jadi alang  
Sikua jadi ayam

SUTAN PAMENAN;  
Kok ketek bana ayam denai  
Lai ko talok dek ayam Tuanku  
Namun sabalun ayam diadu  
Denai batanyo sungguh-sungguah.  
Manang kan lai manarimo  
Kalah kan lai mambaie

RAJO ANGEK GARANG;  
Tasarah dek waang!

SUTAN PAMENAN;  
Kalau baitu kato Tuanku  
Marilah kito padan ayam kito  
Sabalun ayam kadibulang  
Ikolah intan tigo boto  
Kataruah dari ambo  
Mano taruahan dari Tuanku.

RAJO ANGEK GARANG;  
Ikolah pitih dari waden  
Alah ka sanang hati waang  
Capek lapehan ayam waang tu  
Nak capek pulo patah lilienyo

SUTAN PAMENAN;  
Manuruik aturan di galanggang  
Taruhan harus satimpalan  
Dibandiang jo pitih taruhan Tuanku  
Daripado intan dipataruahkan  
Jo pitih nan sabanyak itu  
Labiah elok intan ko den buang ka lautan

RAJO ANGEK GARANG;  
Banyak curito waang  
Nan jaleh ayam ko diadu dulu  
Kok manang waang  
Ambiak pitih ko, ambiak si Ranik Jintan  
Tunangan den tambahannyo

ADU AYAM, ANTARO AYAM SUTAN PAMENAN JO AYAM  
RAJO ANGEK GARANG. AYAM RAJO ANGEK GARANG  
MATI

SUTAN PAMENAN;  
Kini baitu lah dek Tuanku  
Lah samo-samo kito like ayam lago  
Manang kalahnyo lah jaleh pulo Bak janji kito samulo  
Manang iyo ka maelo  
Kalah iyo ka mambaie  
Tandonyo ambo nan manang  
Tantu taruhan ambo bao  
Manyo taruhan dari Tuanku

RAJO ANGEK GARANG;  
Indak waang danga dari tadi  
Kalah indak mambao  
Manang indak manarimo  
Taruhan apo ka waang mintak  
Antah kok tumik na kadapek dek waang

SUTAN PAMENAN;  
Kalau baitu pandapek Tuan  
Kalah jo manang tak ditimbang  
Bia bacarai lihie jo badan

RAJO ANGEK GARANG;  
Banyak bana curito waang!  
Dari Mahek ka Lubuak Aluang  
Singgah ka pakan Balai Batu  
Aie pake nasi baliuang  
Karambia raso goreng paku

SUTAN PAMENAN;  
Kalau iyo molah baitu  
Pucuak dicinto ulam tibo  
Sumua dikali aie datang  
Rancak bapikie Tuanku dauu  
Indak ko ibo angok ka malayang

**RAJO ANGEK GARANG;**

Cukuik!

Jaan waang sambuang kato waang tu lai!

Bareh sipuluik dalam kuali

Usah dilatak ateh dulang

Sujuik suruik waang kumbali

Kok indak angok malayang

**SUTAN PAMENAN;**

Tuan iyo gadang karengkang!

Banyak curito daripado karajo

Kok iyo tuan laki-laki

Mulailah di sinan dek tuanku

Nak denai garik pulo dari siko

**RAJO ANGEK GARANG BACAKAK JO SUTAN PAMENAN**

**SAMO-SAMO SANTIANG**

**TANYATO KASUDAHANNYO RAJO ANGEK GARANG,**

**MAMARINTAHAN DUBALANGNYO NAN BARAMPEK**

**MANGAROYOK SUTAN PAMENAN.**

**SUTAN PAMENAN MANGALUAKAN ILIMUNYO.**

**KALUA DARI KURUANGAN DUBALANG NAN BARAMPEK.**

**KASUDAHANNYO DUBALANG SAMO DUBALANG TU**

**BACAKAK BABUNUHAN.**

**RAJO ANGEK GARANG KASUDAHANNYO MATI JUO.**

**RANIK JINTAN DATANG.**

**MANANGIH DI DAPEK MAIK TUANKU RAJO ANGEK**

**GARANG NAN TABUJUA DI TANAH.**

**RANIK JINTAN;**

Manolah Tuanku Rajo Angek Garang

Apokoh garan nan alah tajadi

Baa kok tabujua maik tuan disiko

Ondeh tuanku Rajo Angek garang  
Lorong di badan diri ambo  
Sudahlah garak jo takadia  
Sadang arek bincano tibo  
Litak tubuah lamahlah tulang

Parpati batalua ateh tanah  
Ka Sikabu denai baokan  
Tuan bakubua di tanah sabingkah  
Denai di mano ditinggakan

\*

IX.  
RANDAI

Kain batiak tanun Palembang  
Dipakai anak Muko-muko  
Ulah parangai Angek Garang  
Indak badan ka cando iko

Alah bajalan Ranik Jintan  
Jalan tak tahu ka tujuan  
Lah panek dek bajalan  
Basuo jo Sutan Pamenan

RANIK JINTAN;  
Manolah Sutan Pamenan  
Apokoh sabab karanonyo  
Mako dibunuah tunangan ambo  
Jaleh inyo tampek balinduang  
Tampek balinduang badan ambo

SUTAN PAMENAN;  
Manolah Puti Ranik jintan  
Tunangan dek Tuanku Angek garang  
Dengan dek puti denai uraikan  
Simakkan bana jaleh-jaleh.

Salaruik salamo nangko  
Tuanku Rajo Angek Garang  
Indak ado urang barani malawan  
Inyo barajo di hatinyo  
Intyo basutan dimatonyo  
Banyaklah urang nan taniayo

Di ma pasa sinan maribuik

Nan ma nan rancak punyo inyo  
Nan ma nan katuju inyo bao  
Diajak musyawarah matonyo merah  
Utangnyo sabalik pinggang  
Sabanyak bintang dilangik  
Sabanyak kayu nan lareh  
Baa dek kito mambiakannyo

RANIK JINTAN;  
Kalau baitu kato Sutan  
Denai lah maklum tantang itu  
Tapi samantangpun baitu  
Inyo kan tampek denai balinduang  
Kok utangnyo nan ka Sutan sabuik  
Jo apo ka denai baie

SUTAN PAMENAN;  
Tak ado kusik tak salasai  
Tak ado karuah tak kajaniah  
Usalhalah cameh jo buruang tabang  
Panek tabang ka inggok juo  
Usah cameh katingga surang  
Kok nan ilang ado ka gantinyo

RANIK JINTAN;  
Mandanga kato dari Sutan  
Raso barangin tengah hari  
Raso sakik ado ubeknyo  
Raso kalam lai ka tarang  
Tapi samantangpun baitu  
Barek rasnyo mangatokan  
Takuik takanai duo kali  
Bak cando urang kini  
Lain kulik lain isinyo

SUTAN PAMENAN;  
Salaruik salamo nangko  
Lori bajaln bajalan ateh kawek  
Sajak mulo kito basuo  
Raso dihati nak kamamikek  
Pikek dimano kadipasang  
Rasonyo hari nan lah paang  
Raso marusuah dalam hati  
Pikek tapasang buruang kok tabang

RANIK JINTAN;  
Kalau iyo baitu janyo Sutan  
Sutan nak kamamikek balam  
Carikan denai alu nan bapucuak  
Carikan denai lasuang nan baurek  
Jikok lai dapek dek Sutan  
Baru denai dapek dek Sutan

SUTAN PAMENAN;  
Kok tak ado pitulo Jawa  
Pitulo paik denai tukakan  
Kok tak dapek dicari di dunia  
Ka langik denai carikan  
Manunggu adiak sakutiko

\*

X.  
RANDAI

Kain batiak raginyo cindai  
Tanunan anak Palambaian  
Ombak cadiak galombang pandai  
Alun nan indak kanampak an

Laruiklah samuik dek manisan  
Serak talendo dek rang mudo  
Baramuak lawuik kintyak pamenan  
Tagah dek ombak ratok sajo

SUTAN PAMENAN;  
Tantangan pintak jo pinto adiak  
Lah denai dapek barang nantun  
Ikolah alu nan bapucuak  
Ikolah lasuang nan baurek  
Alah ka sanang hati adiak

RANIK JINTAN;  
Bukan iko alu nan bapucuak  
Batang rabuang toloang ambiak an  
Bukan iko lasuang nan baurek  
Sayak tampuruang tolong barikan

SUTAN PAMENAN;  
Usah adiak tingkah batingkah  
Danga dek adiak pantun sabuah

Sajak denai gubalo itiak  
Ka Bayang denai dakikan  
Indak den ka Berok lai  
Sajak denai cinto ka adiak

Sumbayang lah den karajoan  
Indak den baampok lai

Usah disabik padi salibu  
Jikok disabik lukolah kaki  
Tasabik pucuak daun ampalam  
Denai mancaliak dalam saribu  
Adiak surang nan tampek hati  
Nan lain buliah denai haramkan

RANIK JINTAN;  
Ayam kuriak lambaian taduang  
Ikua manjelo masuak padi  
Ambiak tampuruang bari makan  
Tujuh bukik sambilan gunuang  
Tuan nan surang dalam hati  
Nan lain dapek denai lupokan

SUTAN PAMENAN;  
Kok ka Piladang ka babelok, diak oi  
Masuak kualo Aie Haji  
Jalan nak urang ka Singgalang  
Kalau bak itu kato adiak  
Lah samo sanang dalam hati  
Molah kito samo pulang

\*

XI.  
RANDAI PENUTUP

Batusangka balantai batu  
Parak Juao labuah basilang  
Randai sakitu lah dauu  
Talempong mairiang di balakang

Kok lai ado sumua di ladang  
Buliahlah kito manumpang mandi  
Mandi barang ka tapian  
Kok lai umua samo panjang  
Randai nan lain diulang lai  
Disiko dulu diantian

\*

tamat

## Biodata

**WISRAN HADI** (HADI kependekan dari nama ayahnya alm. HAJI DARWAS IDRIS, ulama ahli hadist dan Imam Besar Masjid Raya Muhammadiyah Padang) adalah seorang sastrawan/budayawan Indonesia yang banyak menulis karya sastra (novel, cerita pendek, drama, cerita randai dan skenario film), sutradara teater dan film, pembina berbagai kesenian tradisi Minangkabau, wartawan, penulis esei dan artikel. Lahir dan dibesarkan di ranah Minang, Sumatera Barat. Tamat STSI "ASRI" Jogjakarta 1969.

1977 mewakili Indonesia dalam *International Writing Program* (Pertemuan Penulis-penulis Internasional) di Iowa University, Iowa, USA selama 4 bulan.

1978 melakukan observasi teater modern Amerika Serikat di New York.

1987 kembali melakukan observasi teater modern Amerika dan Jepang selama 5 bulan.

1991 dan thn. 2000 mendapat penghargaan sebagai Sastrawan Terbaik Indonesia oleh Departemen Pendidikan dan Kebudayaan Republik Indonesia yang diserahkan Menteri P dan K di Jakarta.

2000 mendapat penghargaan South East Asia Write Award (Hadiah tertinggi untuk Sastrawan ASEAN) dari kerajaan Thailand yang diserahkan Raja Thailand di Bangkok.

2003 mendapat Anugerah Seni dari Pemerintah Indonesia yang diserahkan oleh Menteri Parnesibud atas jasa-jasanya dalam menaikkan marwah seni di dalam dan di luar negeri.

Sejak 2001 sampai 2005 menjadi dosen tamu pada Akademi Seni Kebangsaan, Kementerian Kebudayaan, Kesenian dan Warisan Malaysia di Kuala Lumpur.

2005 menjadi salah seorang panelis dalam Debat Publik bagi semua calon Gubernur Sumatera Barat yang dilaksanakan KPUD Sumatera Barat di TVRI Stasiun Padang.

2005 mendapat penghargaan sebagai Budayawan oleh Pemda Kota Padang yang diserahkan oleh Walikota Padang dalam peringatan hari kemerdekaan RI 17 Agustus 2005.

2005 - sampai sekarang menjadi penulis tetap untuk Lembaran Stres Harian Padang Ekspes.

2006 – sampai sekarang mengasuh rubrik SURAMBI ADAT WISRAN HADI di TVRI Sumatera Barat.

2007 – sampai sekarang menjadi Dewan Pakar ICMI Sumatera Barat.

## Buku-buku yang telah terbit.

1. *Tamu* diterbitkan oleh PT Pustaka Utama Grafiti dan mendapat penghargaan Buku Utama dari IKAPI dan Dept. P dan K Jakarta, juga dipilih untuk menjadi buku bacaan pelajar di Indonesia. Sebelumnya diterbitkan secara bersambung pada Harian Umum Republika Jakarta.
2. *Imam* diterbitkan oleh Pustaka Firdaus, Jakarta. Sebelumnya secara bersambung telah diterbitkan Harian Umum Republika Jakarta.
3. *Orang-orang Blanti* diterbitkan oleh Penerbit Citra Budaya, Padang.
4. *Negeri Perempuan* juga diterbitkan oleh Pustaka Firdaus Jakarta.
5. *Dari Tanah Tepi* (kisah perjalanan Haji) diterbitkan oleh Balai Pustaka Jakarta. Sebelumnya secara bersambung telah diterbitkan Harian Singgalang Padang.
6. *Pelarian* diterbitkan secara bersambung pada Harian Republika, Jakarta
7. *Daun-daun Mahoni Gugur Lagi* (kumpulan 22 buah cerpen) diterbitkan oleh Penerbit Fajar Bakti Sdn. Bhd. Malaysia.
8. *Guru Berkepala Tiga* (kumpulan 22 buah cerpen) diterbitkan oleh Balai Pustaka Jakarta.

9. *Puti Bungsu* (Wanita Terakhir) diterbitkan oleh Pustaka Jaya dan Balai Pustaka Jakarta.
10. *Anggun Nan Tongga* diterbitkan Balai Pustaka, Jakarta sampai cetakan VI.
11. *Jalan Lurus* diterbitkan PT Angkasa Bandung. Mendapat Hadiah Sastra 1991 oleh Pusat Pengembangan Bahasa, Dept. P dan K Jakarta. Buku tersebut juga mendapat hadiah sebagai buku drama terbaik pada Pertemuan Sastrawan Nusantara 1997.
12. *Empat Sandiwara Orang Melayu* (kumpulan naskah drama) diterbitkan PT Angkasa Bandung. Mendapat hadiah sebagai buku drama Indonesia terbaik oleh Departemen Pendidikan dan Kebudayaan 2000 dan dipilih pula menjadi buku bacaan pelajar.
13. *Empat Lakon Perang Paderi* (Kumpulan naskah drama tentang Perang Paderi) diterbitkan oleh Angkasa Bandung, pada tahun 2002 difilmkan oleh TVRI Pusat dengan judul PERANG PADARI.
14. *Roh dan Nyonya2* (naskah pemenang naskah sayembara DKJ 2004) diterbitkan dalam Kumpulan Drama *Sobrat* diterbitkan Grasindo Jakarta.
15. *PEMBISIK* diterbitkan dalam kumpulan cerpen terbaik harian Republika, Jakarta.
16. *Haji Amran Sutan Sidi Sulaiman, Pendiri Yayasan Baiturrahmah* – biografi, Padang 2007.

15 karya dramanya adalah pemenang dalam Sayembara Penulisan Naskah Sandiwara Indonesia yang diadakan oleh Dewan Kesenian Jakarta semenjak 1976 s/d. 1998, 2004.

13 karya dramanya yang lain diterbitkan oleh Proyek Pengadaan Buku-buku Sastra Departemen Pendidikan dan Kebudayaan RI Jakarta.

7 karya dramanya telah difilmkan oleh TVRI Palembang, TVRI Padang dan TVRI Jakarta; Empat lakon Perang Paderi, Kau Tunggu Siapa Nilo, Cindra Mata dan Anggun Nan Tongga.

Dia juga menulis naskah randai; *Sabai Nan Aluih, Manih Talonsong, Cindua Mato, Puti Nilam Sari, Umbuik Mudo, Sutan Pamenan, Puti Bungsu, Hari Jadi Padang*, telah dipentaskan oleh grup-grup randai di Padang dan Malaysia.

Tulisan-tulisan lainnya berupa makalah telah banyak dipresentasikan dalam berbagai seminar di Indonesia dan Malaysia. Sedangkan tulisan-tulisan artikel, esei, features, catatan kebudayaan telah dimuat pada berbagai surat kabar dan majalah, di antaranya; Majalah sastra Horison Jakarta, Harian Umum Republika Jakarta, Harian Kompas Jakarta, Singgalang, Haluan, Mingguan Tribne Sumbar dan Padang Ekspres di Padang.

Selain menulis, dia juga memimpin BUMI TEATER dan telah mementaskan drama-dramanya di Taman Ismail Marzuki dan berbagai kota lainnya dan di Malaysia (Kuala Lumpur dan Johor Bahru).

Pernah menjadi redaktur Harian Singgalang, redaktur majalah kebudayaan Limbago, sekretaris eksekutif dan dosen Akademi Pariwisata Bunda, Direktur Kerohanian pada Ruang Pendidik INS Kayutanam, dosen tamu pada Fakultas Sastra dan Fakultas Pertanian Universitas Andalas serta Universitas Bung Hatta.

Alamat:  
Jalan Gelugur Blok H no. 2  
Wisma Indah II  
Padang 25142  
Telp. 0751 7052174

This document was created with Win2PDF available at <http://www.daneprairie.com>.  
The unregistered version of Win2PDF is for evaluation or non-commercial use only.